

Salih Kabil - geodeta



Bosna i Hercegovina izgubila je još jednog velikana katastra Bosne i Hercegovine.

Za ime našeg dragog kolege Saliha vezane su mnoge aktivnosti katastra zemljišta, bilo kada se misli na austrijski katastar ili pak novi koji nastaje u uslovima novog aerofotogrametrijskog premjera teritorija Bosne i Hercegovine. Angažovanošću Saliha Kabila Bosna i Hercegovina je pomogla, kroz stipendiranje, obrazovanje velikog broja geodetskih stručnjaka u Geodetskoj srednjoj tehničkoj školi, te na fakultetima Zagreba, Beograda i Ljubljane.

Kontinuitet geodetske službe Bosne i Hercegovine tijesno je povezan sa imenom Saliha Kabila.

Salih Kabil rođen je u Trebinju 25. maja 1911. godine, a svoj plodni rad i plemeniti život velikog humaniste i stručnjaka završio je smrću 22. augusta 2001. godine. Do kraja svog života interesovao se za stanje iz oblasti geodezije Bosne i Hercegovine, o kadrovima i organizacionim formama.

Srednju tehničku školu-geodetski odsjek završio je 1931. godine. U geodetskoj službi je stalno od 1932. godine. Na novom premjeru u Srbiji proveo je dvije godine, a zatim u katastarskim upravama (Derventa, Trebinje, Tešanj i Teslić) na održavanju katastra. Godine 1948 imenovan je za Upravnika uprave za katastar BiH, a oktobra 1955 za direktora Geodetske uprave NRBiH, gdje ostaje do odlaska u mirovinu.

Kao upravnik Uprave za katastar bio je organizator i rukovodilac radova na reviziji katastra, koja je izvršena na području cijele Bosne i Hercegovine u vremenu od 1948. do 1953. godine, a isto tako i radova na uspostavi popisnog katastra na područjima za koja su podaci premjera i katastra zemljišta, u toku rata bili uništeni. Kao direktor Republičke geodetske uprave doprinio je mnogo razvoju geodetske službe u Bosni i Hercegovini i njenom organizacionom i kadrovskom jačanju. Pored redovne dužnosti predavao je kao honorarni nastavnik na Geodetskoj tehničkoj školi neprekidno od 1951. do 1964. godine.

Učesnik NOP-a od marta 1943., a učesnik NOR-a kao oficir od jula 1944. godine. Nakon oslobođenja Teslića izabran za člana Sreske skupštine, a juna 1945. odmah nakon oslobođenja Banja Luke kooptiran je od strane Okružnog narodnog odbora Banja Luka i povučen na rad u Okružnu upravu narodnih odbora u Banja Luku. Septembra 1945. godine premješten je u Zemaljsku upravu narodnih odbora, a zatim u Ministarstvo poljorivrede i Geodetske uprave NRBiH.

Od oslobođenja 1945. godine stalno je radio kao društveno-politički radnik. Učestvovao u pripremama za osnivanje Društva inženjera i tehničara, gdje je angažovan kao prvi sekretar Glavnog odbora DIT-a BiH od 1948. do 1953. godine. Bio sekretar Društva geodeta BiH dvije godine, i član Upravnog odbora od 1959. godine. Jedan je od inicijatora

i organizator osnivanja Saveza društva geodetskih inženjera i geometara FNRJ u Beogradu, te član Savjeta Više geodetske škole u Sarajevu od njenog osnivanja i Predsjednik Savjeta Više geodetske škole.

Za svoj rad odlikovan je medaljom zasluga za narod i Ordenom rada III reda.

Objavio je niz radova, kao što su :

- Stanje katastra zemljišta u NRBiH u vezi sa oporezivanjem prihoda zemljišta, na bazi katastarskog čistog prihoda (1951.);

- Narodni odbori i katastarska služba (1953.);

- Organizacija geodetske službe u sastavu komune (1955.);

- Uloga i značaj geodezije u građevinarstvu (1956.);

- O ulozi i zadacima geodetskog stručnjaka (1957.).

Život i rad na polju geodezije i briga o mladim kadrovima i za mlade visoko obrazovane kadrove, te ljubav prema rodnom Trebinju i briga za porodicu u najkraćem su Salihove posebne vrline.

Uživao je izuzetno poštovanje kako među geodetskim stručnjacima Bosne i Hercegovine tako i šire.

Malo je reći hvala dragi Salihe za sve što si u svom vijeku odradio za dobrobit geodetske službe, ali ostade nam toliko da ovom prilikom iskažem zahvalnost u ime svih geodeta Bosne i Hercegovine, tvojih prijatelja i poštovalaca.

Mustafa Begić